

TUSI TAIALA

MO LE PULEA MA LE VA'AIA LELEI O I'A MA FIGOTA

O LE AFIO'AGA O

VAILUUTAI

Iulai 17, 1998

SAUNIA:

Pule mamalu a Alii ma Faipule ma tagatanuu o le Afioaga o Vailuutai ma le Lagolagosua a le Vaega o Faigafaiva o le Matagaluega o Faatoaga ma Faigafaiva.

FAASOLOGA

1. Upu Tomua	3.
2. Autu	4.
3. Faamatalaga e uiga i le Afioga	4.
4. Ituaiga Faigafaiva Taatele	4.
5. Tulafono faa-le-nuu e fesootai ma le siosiomaga o le gataifale o Vailuutai	4.
6. Tapenaga o lenei Tusi Taiala	4.
6.1. Feiloaiga muamua ma le uluai fono ma le afioga	4.
6.2. Faatalatalanoaga ma vaega e tolu	4.
6.3. Komiti Faufautua o le Faasao	4.
6.4. Pasiaina o le Tusi Taiala	4.
6.5. Filifiliga o le Komiti o le Faasao	5.
7. Fuafuaga Faataatitia	4.
7.1. Ia faamalosi tulafono faa-le-nuu e faasaina ai faigafaiva le talafeagai.	6.
7.2. Ia faasaina le lafoai o lapisi i le sami ma le matafaga	7.
7.3. Ia faasaina faigafaiva mai isi afioga	8.
7.4. Ia faasaina ona toe fagotaina mai i'a ma figota laiti	8.
7.5. Ia aoina mai i uta alamea ma faatamaia ai	9.
7.6. Ia faasaina ona toe taina faaleagaina/taina totagoto	9.
7.7. Ia faasaina upega ma tili mataninii	10.
7.8. Faasaoina o se vaega o le gataifale (Ogasami Faasaoina)	11.
7.9. Tufaina atu ma le faafaatoagaina o i'a ma figota	12.
7.10. Ia faasalalauina tulafono a le afioga	12.
7.11. Ia faasaina Tui'ga ma Faamo'a	13.
7.12. Ia faasao ma faateleina amu	13.
7.13. Ia faasaina le fagotaina o fugafuga, mama'o, maisu ma isi figota o lenei ituaiga mo le faatauina atu ai mo maketi i fafo	14.
7.14. Ia faasaina le laueseina o le oneone	14.
7.15. Ia unaia faigafaiva i tuaau ma aoaoga mo faigafaiva	15.
8. Malilliega	17.
9. Upu Mulimuli	17.
10. Ituaiga o Faigafaiva e Faatino i aso uma	18.
11. I'a ma Figota	18.
12. Sui o le Afioga sa auai i faatalatalanoaga i vaega e tolu	19.
13. Komiti o le Faasao	19.
14. Sui o le Vaega o Faigafaiva	20

1. UPU TOMUA

O faigafaiva i Samoa e taua tele aua o se tasi lea o auala e maua ai le fofoga taumafa aemaise lava i nuu ma afioaga i tua. I le tele o afioaga, latou te le o faatauaina le vaaia lelei o le tamaoiga ma le siosiomaga o le gataifale. O le aumaia ma le faaaogaina o ituaiga faigafaiva faa-onapo-nei e i ai mea manava, upega ma tili mataninii, ma vilaaau oona e faamata faigofie ai ma tele i'a maua ae o loo faatamaia ai le siosiomaga o le gataifale ma ona tamaoiga. O le faatinoina foi o atinae i luga o le gataifale ua faaleagaina ai le tele o nofoaga ma le miliona o meaola o le gataifale.

O le polokalame o le faasaoina o le gataifale na amata mai e le ofisa o faigafaiva i le tausaga 1995. O le faamoemoe o le polokalame ina ia toe tapue mai le tamaoiga o le gataifale ma puipua ai le siosiomaga.

O taualumaga o le polokalame e aofia ai le soalaupuleina ma le fausiaina o se Tusi Taiala. O lenei Tusi Taiala o loo tamauina ai fuafuaga faataatitia a le afioaga ma le ofisa o faigafaiva. O nei fuafuaga faataatitia e unaia ai le pulea lelei ma fuafua tatau o le faaaogaina o le tamaoiga o Vailuutai.

2. AUTU

O le autu lenei sa faatalatalanoaina ma malilie autasi i ai vaega taitasi o le afioaga;

- 1. Ina ia puipua le siosiomaga o le gataifale ma,**
- 2. Toe faatupulaia le tamaoiga o le gataifale mo tupulaga o le lumana'i**

3. FAAMATALAGA E UIGA I LE AFIOAGA

O le afioaga o Vailuutai e i le itu i saute i sasa'e o le motu o Upolu ma lona faitauaofai e tusa ma le 670-700 aofia ai matai, tina ma tamaitai, aumaga ma tamaiti. E le aofia ai i latou ua faimalaga atu i atunuu i fafo e i ai Niusila, Ausetalia ma le Iunaite Setete o Amerika.

O Vailuutai e i ai lona a'au e mai lava i le itu i sasae seia paia le itu i sisifo i le mamao pea ma le 700-800 mita. O le umi o le a'au e pea ma le 200-300 mita mai le matafaga. O le vaega pito loloto o le aloalo e tusa ma le 30 futu i taimi e sua ai le tai ae 30 futu nisi o vaega o le gataifale pea oo ina pe le tai.

O lenei afioaga e mamalu tele ona pulega. O le aumaga e lava saunia i taimi uma aua le tautuaina o matai, o tina latou te avatua fautuaga lelei mo ni mataupu tau lotoifale o le afioaga.

4. ITUAIGA FAIGAFAIVA TAATELE

E tele ituaiga faigafaiva e mafai ona faatinoina i le aloalo o le afioaga o Vailuutai. O nisi o nei ituaiga faigafaiva e i ai matatao, uaua malau (toso), ma le faaaogaina o upega (e tele ina faatinoina e alii) mo le fofoga taumafa a le aiga pe faatau foi. O le aoina ma le eliina o figota i luga o le aau o le galuega patino lava lea a tina ma le fanau mo taumafa a le aiga.

O le faatinoina o faigafaiva-le-talafeagai e i ai fanaia ma ava-niu-kini ua matua faasaina lava i lalo o le pulega mamalu a Alii ma Faipule. E tutusa lelei lava ma le faaaogaina o tane mauulu ma mea manava (scuba gears) i fagotaga ua matua faasaina lava ona toe faatinoina i gataifale o le afioaga.

O le tele o i'a sa maua i aso ua mavae ua faigata ona maua i aso nei. O i'a o le aloalo e i ai lo, poge ma alogo, anae ma mataeleele sa tele ma faigofie ona maua i le 30 tausaga talu ai. E oo foi i figota e i ai le sisi, faisua faapea sea, loli, mamao ma fugafuga sa tele i aso ua mavae. I le taimi nei, o nei i'a ma figota ua pau maualalo le faitau aofai ma e tele ni itula e faaalaina mo fagotaga faatoa maua se meaai mo le aiga, pea faatusatusa i le 30 tausaga ua mavae.

5. TULAFONO FAA-LE-NUU E FESOOTAI MA LE SIOSIOMAGA O LE GATAIFALE O VAILUUTAI

O Vailuutai e i ai ona tulafono i aso ua mavae e faasaina ai faigafaiva-le-talafeagai e pei o fanaia, ava-niu-kini, vailaau oona, lama moli-uila ma tane mauulu (scuba gears) ua matua faasaina ona toe vaaia.

Ua faasaina foi tagata mai isi afioaga ona toe fagotaina gataifale o lenei afioaga. E ui lava ina ua i ai tulafono e pei ona taua, e le o atoatoa lona faatinoina ma lona vaaia ona o le aloaia e au faifaiva mai isi afioaga. O le isi itu o le mamao lea i tai o nofoaga o loo faatinoina ai nei ituaiga o faigafaiva atoa ai ma auala o loo faaaogaina.

6. TAPENAGA O LENEI TUSI TAIALA

O lenei tapenaga sa saunia lava e alii ma faipule ma tagatanuu o Vailuutai faatasi ai ma ni fautuaga ma le lagolagosua a le Ofisa o Faigafaiva o le Matagaluega o Faatoaga ma Faigafaiva. O se oototoga lenei i le tapenaga o lenei Tusi Taiala ina ua maea ni fonotaga sa faia ua taua i lalo.

6.1 Feiloaiga Muamua ma le Afioaga.

I le amataga mai o le polokalame, sa faapea ona faatoai mai se finagalo o le Pule Mamalu a Alii ma Faipule i le Ofisa o Faigafaiva e faailoa ai lo latou fiafia e auai i le Polokalame mo le Puipuiga o Gataifale. O le Aso 13 Aperila 1998 sa faia ai se feiloaiga muamua (fono) a le Ofisa ma le afioaga e faamalamalama ai le polokalame pe taliaina e le afioaga. O le fono foi lena sa auai ai le Faatonu Lagolago, Alii ma tamaitai Ofisa e taliaina aloaia ai se finagalo o le afioaga i le polokalame. O le maea o lenei feiloaiga muamua ma

taliaina lelei ai e le afioaga le polokalame, ma filifili ai le Aso 19 Me 1998 mo faatalatalanoaga ma vaega e tolu o le afioaga e aofia ai Alii ma Faipule, Komiti a Tina ma Tamaitai ma le aumaga.

6.2 Faatalatalanoaga i Vaega e tolu.

O le taua o lenei faatalatalanoaga ina ia vaevaeina le afioaga i vaega e iai matai, tina ma aumaga. O nei vaega e tolu sa faatalatalanoaina e sui o le Ofisa o Faigafaiva. O le autu tonu o nei faatalatalanoaga ina ia mafai e le afioaga ona faailoa mai faafitauli o loo aliaie mai le siosiomaga o le gataifale o Vailuutai. Sa faapea foi ona sailia ai ma ni aafiaga ma ni mafuaaga o nei faafitauli. O ni fofo, faatinoga ma i latou e faatinoina nei fofo sa faailoa mai.

VAAIGA I LE TAIMI O FAATALATALANOAGA I VAEGA E TOLU

6.3 Komiti Faufautua o le Faasao:

O le matafaioi a le komiti faufautua o le tuu-faatasia lea o faamaumauga ma faamatalaga mai vaega taitasi ma sa mafai ai ona latou tapenaina se ata faataitai o le Tusi Taiala.

TUSI TAIALA MA LE TAUAOFAIGA O LE FONO MULIMULI

6.4 Pasiaina o le Tusi Taiala.

O le faagasologa atoa o nei fuafuaga fa'aatitia a le afioaga e aofia ai foi ma fuafuaga fa'ata'atitia e lagolagosua mai ai le ofisa o faigafaiva.

O lenei Tusi Taiala sa tuuina aloaia i le fono a matai e sui o le komiti faufautua ma sui o le ofisa o faigafaiva mo le pasiaina ma amata faatino ai loa galuega ma matafaioi a vaega taitasi. O le fono foi lea e filifilia ai loa ma le 'Komiti o le Faasao' e taitaia le faagaioiga o fuafuaga ua uma ona fa'ata'atitia.

6.5 Filifilia o le Komiti o le Faasao

O le komiti o le faasao sa filifilia mai i vaega taitasi i taimi o faatalatalanoaga, latou te mataituina fuafuaga faataatitia a le afioaga. E maea loa le paisiaina o le Tusi Taiala o le a faafesootai lava le ofisa ma le komiti i tulaga uma lava e manaomia ai le fesoasoani e pei ona autasi ma tamaaina i le Taiala.

7. FUAFUAGA FAATAATITIA

O fuatuaga fa'ata'atitia o ni gaioga ua faamoemoe e faaono foia ai faafitauli ua faaalua ma faailoa mai e vaega eseese o le afioaga. E lua (2) ituaiga o fuafuaga, ma o le fuafuaga ua aupito sili ona ta'ua o ;

- fuafuaga faataatitia a le nuu.

O le isi vaega o fuafuaga faataatitia o le ofisa o faigafaiva ma o nei fuafuaga o le tuuina atu o fuatuaga ma fesoasoani ini nisi auala e pei o aoaoga ma le tufatufaina o pepa o faamatalaga i mataupu e fesoootai i le gataifale. O galuega uma lava e faatinoina e le ofisa o faigafaiva e ao ona faamaonia e le faatonu lagolago (Assitant Cheif Executive Officer) a le matagaluega o faatoaga ma faigafaiva.

I taimi o faatalatalanoaga i vaega taitasi, e tele ni mafuaaga sa faailoa mai ae auga lava i le faafitauli ogaoga o le faaititia lea o i'a ma figota i le aloalo ma aau o le afioaga o Vailuutai.

O mafuaaga ma o latou aafiaga i le siosiomaga o le gataifale sa faapea ona iloilo ina ma sailia. O tali o faafitauli ma fofu poo auala e foia ai na iloilo ina foi i faatalatalanoaga. E le gata i lea sa faailoa mai ai foi ma vaega latou te faatinoina nei galuega.

O le vaega i lalo o le a auiliiliina atu ai atoatoa fuafuaga fa'ata'atitia sa aoina mai i vaega taitasi ma tuufaatasia e le komiti faufautua ma le lagolagosua a le ofisa o faigafaiva.

Tulafono Autu Tau Faigafaiva (1988) : O le tulafono a le Malo o Samoa e ;

(1) Faasaina o Faigafaiva-le-Talafeagai,

(2) Faamalositia ai le Laiseneina o Vaa-Fagota.

Tulafono Faatonutonu Mo Le Laiti Faatapulaaaina mo I'a ma Figota (1995) : O le tulafono lea e faatapulaaaina ai le laiti o i'a ma figota, ma le fuaina o mata-upega.

Tulafono Laiti : O tulafono a le nuu ma afioaga ua amanaia e le Faamasinoga.

7.1 FAAMALOSIA TULAFONO FAA-LE-NUU E FAASAINA AI FAIGAFAlVA-LE TALAFEAGAI

Otootoga

Na faaalua e vaega taitasi i taimi o faatalatalanoaga o loo faaauuina pea le faaaogaina e faifaiva o fanai'a, ava niu kini ma vailaau oona i fagotaga. O nei faigafaiva-le-talafeagai ua maunoina lo latou tulaga ogaoga i le faatamaiaina o le siosiomaga o le gataifale, e pei o i'a laiti aemaise o nofoaga taua mo meaola o le sami e iai amu. O le faaleagaina o le gataifale mai nei ituaiga auala faa-faigafaiva e umi ma tele se taimi e toe faafoi ai i le lelei sa i ai.

Fuafuaga faataatitia a le afioaga

Talu ai ona o le tulaga pagatia ua iai le gataifale o leni nuu o Vailuutai o lea na ae ai se finagalo autasi i le komiti faufautua ina ia matua faamalositia tulafono a le afioaga e faasaina ai faigafaiva-le-talafeagai e pei o fanai'a, ava-niu-kini ma vailaau oona. O le puipuiga ma le faamamaluina o nei tulafono o le a i aao lava o le pule mamalu a ali'i ma faipule faatasi ai ma le lagolagosua a tagata nuu o le afioaga.

Faautaga

Ia toe faamslosia ma fa'amamaluina tulafono ua taua i lalo a le afioaga mo le fa'asaina o faigafaiva le talafeagai.

Tulafono

**Mo le mamalu o le atunuu atoa ai ma tagatanuu o Vailuutai:
Ua tasi nei le tofa ma le faautaga i alii ma faipule o Vailuutai, ua matua faasaina lava faigafaiva le falafeagaia e pei o fanai'a, ava niukini, ma vailaau oona i gataifale o le afioaga.**

Faasalaga

**Mo tagata o le afioaga e solia lenei tulafono, o le a faasalaina i le \$500.00.
O tagata mai isi afioaga o le a molia sao i le Tulafono Autu Tau Faigafaiva ma le Tulafono Laiti a le ofisa o faigafaiva.**

Fuafuaga faataatitia a le ofisa o faigafaiva

O le a fesoasoani le ofisa i le tufatufaina o pepa o faamatalaga i faigafaiva-le-talafeagai aemaise ai o le faatinoina lea o suesuega ma moliaga o tagata ua faamaonia lona faatinoina o nei faigafaiva i le faamasinoga a le Malo o Samoa.

7.2 IA FAASAINA LE TOE LAFOAI O LAPISI I LE SAMI MA LE MATAFAGA

Otootoga

O lapisi lafoai i le sami ma le matafaga e avea ma ala e faamanualia ai pe lavevea ai aao o le aufaifaiva. E le o se vaaiga matagofie o loo iai le matafaga ma le siosiomaga o le gataifale i le taimi nei, ma ua avea ma tulaga e faaititia ai tagata tafafao mai e afea le afioaga. E le gata i lea o le faaleagaina ai o le siosiomaga o le gataifale ma faatamaia ai o nofoaga mo meaola o le sami.

Fuafuaga faataatitia a le afioaga

O le a faamalositia e le afioaga le faasaina ai ona toe lafoai lapisi i le matafaga ma le sami ae saunia ni galuega mo le afioaga atoa e faamama ai lapisi, e pei o le fausiaina o fatalapisi po o le eliina o se lua e lafoai i ai.

Tulafono

Ua matua faasaina ona toe lafoai lapisi ma otaota e pei o atigi apa, atigi fagu, uamea, pepa iila, ma soo se ituaiga lapisi lava e ono aafia i le siosiomaga o le gataifale.

Faasalaga

**Mo tagata o le afioaga e solia lenei tulafono, o le a faasalaina i le \$100.
O tagata mai isi afioaga o le a molia i le Tulafono Laititi a le afioaga e faasaina ai le lafoai o lapisi i le gataifale ma le matafaga.**

Fuafuaga faataatitia a le ofisa

O faamatalaga eseese e faatatau i aafiaga o le gataifale ma ona tamaoaiga o le a fesoasoani atu iai le ofisa e ao-tauina ai le afioaga i le taua o le teumaluina o lapisi ma otaota i nofoaga talafeagai.

7.3 IA FAASAINA FAIGAFAIVA MAI ISI AFIOAGA

Otootoga

Ua maitauina le toatele o tagata mai isi afioaga ua latou fagotaina gataifale o le afioaga o Vailuutai. Ua le gata i lea, ua latou faatamaia foi le gataifale i ni auala le talafeagai ma ua utiuti ai le tamaoaiga e maua mai aloalo o lo o faalagolago iai le afioaga.

Fuafuaga faataatitia a le afioaga

Ua i ai se fuafuaga a le afioaga o le a faia se tulafono e faasaina ai tagata mai isi afioaga ona fagotaina o latou gataifale.

Tulafono

Ua matua faasaina lava tagata mai isi afioaga ona toe fagotaina gataifale o Vailuutai e aunoa ma se silafia poo se feutagaiga ma le pule mamalu a alii ma faipule i le tolu aso ao lumanai se faiva.

Faasalaga

O le solia o lea tulafono e molia ai le na faatinoina i le Tulafono Laititi o faigafaiva a le afioaga

Fuafuaga faataatitia a le ofisa

O le a lagolagosua le ofisa i le suesueina ma le faatinoina o moliaga o le ua soli-tulafono i le faamasinoga a le Malo o Samoa.

7.4 IA FAASAINA ONA TOE FAGOTAINA MAI I'A MA FIGOTA LAITI

Otootoga

O le tele o afioaga ua latou faaalua mai le toatele o faifaiva latou te fagotaina mai i'a ma figota laiti. O le mafuaaga lea ua vave faaititia ai i'a ma figota, ona ua le maua se avanoa e tautuufua ma fanafanau ai nei meaola.

Fuafuaga faataatitia a le afioaga

Ua i ai le fuafuaga a le afioaga o le a lagolagoina le tulafono o faigafaiva mo le lapopoa faatapulaaina e fagotaina ai i'a ma figota.

Tulafono

Ua matua faasaina ona toe fagotaina i'a ma figota laiti mai le gataifale o Vailuutai, e pei ona faaalua i le Tulafono Faatonutonu o Faigafaiva a le Malo o Samoa.

Faasalaga

**O tagata o le afioaga e solia leni tulafono o le a faasalaina i le \$100.00.
O tagata mai isi afioaga e solia leni tulafono, o le a molia ma faasalaina i le Tulafono Faatonutonu o Faigafaiva a le Malo o Samoa mo le fua faatapulaa mo i'a ma figota.**

Fuafuaga a le Ofisa o Faigafaiva

O le a fesoasoani le ofisa mo le tapenaina o tulafono laiti e faasaina ai le fagotaina o i'a ma figota e laiti ifo nai loo le fua faatapulaa o i'a ma figota aemaise pepa o faamatalaga e faamalamalama ai le puipuiiga o le fagotaina o i'a ma figota laiti.

7.5 IA AOINA MAI UTA ALAMEA MA FAATAMAIA AI

Oototoga

O le alamea o se meaola o le ituaiga o le aveau ma e nofo i luga o le aau. O leni meaola e na te aiina meaola ninii ua taua o POLIPE o loo tutupu mai ai amu. A oo ina faateleina le alamea o le a faapena ona latou faatamaiaina se vaega tele o le aau ma avea ai o se tulaga pagatia. O le a aafia ai le tele o meaola o loo faalagolago i le aau mo nofoaga ma meaai. E le mafai ona faa-umatia le alamea i le vaevaeina o lona tino i le sami aua e mafai e nei itu tino ona faatupuina mai ai nisi alamea fou.

E pau le auala e mafai ona tapeina ai leni meaola o le aoina mai lea i uta i le pau matu e faamagoina ai pe tanuina foi. E mafai ona faaogaina leni meaola o se faalelei eleele mo faatoaga ma mea toto.

Fuafuaga faataatitia a le afioaga

Ua faailoa mai e le afioaga o le alamea o se tasi lea o mafuaaga o le pe o le amu o le gataifale. E aafia ai foi le soifua o tagata faifaiva ma ua fautuaina ai e le komiti faufautua ina ia faatinoina le aoina i uta mo le faatamaiaina o leni meaola faalafua.

Fautuaga

Ua fautuaina e le komiti faufautua o le aoina mai i uta o le alamea, o le a faatinoina lava lea e tagatanuu o le afioaga. O le faatinoina o leni fuafuaga o le a aoina tai-ono masina alamea ma aumai i le pau-matu e faatamaia ai ma faaogaina ai mo le faalelei eleele.

Fuafuaga faataatitia a le ofisa

E leai se polokalame a le Malo ua fuafuaina e totogi ai le faatamaiaina o le alamea vagana ai ni fautuaga e fesoasoani atu ai le ofisa i auala talafeagai e tineia leni meaola faalafua e ala atu i Pepa o faamatalaga ua maea ona saunia.

7.6 IA FAASAINA ONA TOE FAALEAGAINA/TAINA TOGATOGO

Oototoga

O togatogo o se taxi leni o vaega ua tele sona sao i le gataifale mo le toe faatupuina o nisi o i'a ma figota. O le taua o le faasaoina o togatogo ona o nisi meaola ninii o le gataifale ua avea lea nofoaga ma vaega e sulufai i ai mai o latou fili, a'o nisi i'a ma figota

ua avea togatogo ma nafooga e fanafanau ai. A tanumia pe taina i lalo ma faafeagaina togatogo o lona uiga o le a faaititia i'a ma figota mo tupulaga o le lumanai.

Fuafuaga faataatitia a le afioaga

Ua ioeina e le komiti le tatau ona faamalosia le aasaina o le togatofo ona o le fia faasaina pea o i'a ma figota ma isi meaola o loo avea lea vaega ma nofoaga e fanafanau ai. O le faasaina o lenei togatogo o le a faamamaluina e le Pule Mamalu Alii ma Faipule o Vailuutai.

Tulafono

Ua matua faasaina ona toe taina i lalo ma faatamaia pe faaleagaina togatogo o lo'o ola i totonu o se vaega faasaina i le gataifale o Vailuutai.

Faasalaga

So'o se tasi o le afioaga o le a solia lenei tulafono o le a faasalaina i le \$100.00. O tagata i fafo atu o le afioaga o le a molia sao i le Tulafono a le Malo.

Fuafuaga faataatitia a le ofisa

O le a fesoasoani le vaega o Faigafaiva i le molioaina o se tasi e solia lenei tulafono aemaise lava mo tagata mai i isi afioaga e faa-faigata ona faasalaina i le malosiaga o pulega faa-le-nuu.

O le a fesoasoani le Ofisa i le tuina atu lea o ni pepa o faamatalaga e faatatau i le taua ma le aoga o le Togatogo e faamalamalama atili ai lenei mataupu.

7.7 IA FAASAINA UPEGA MA TILI MATANINII.

Otootoga

O le faaaogaina o upega ma tili mataninii ua maitauina le tele o i'a laiti ua faatamaia ai. Ua i ai le talitonuga o le a oo atu i se tulaga faaletonu i'a maua pe a faaauauina pea nei ituaiga faigafaiva. O le a oo ina faaititia i'a ma figota e mafai ona oo atu lo latou lapopoa e maua ai le avanoa e fanafanau ma tautuufua ai.

Fuafuaga faataatitia a le afioaga

Ua faailoa mai e le komiti o le faaaogaina o upega ma tili mataninii, o se tasi lea o mafuaaga ua faaititia ai i'a maua i le gataifale. O lea ua aiaia ai loa se tulafono ina ia faasaina ai upega ma tili mataninii ona toe faaaogaina i fagotaga i le gataifale o le afioaga. Ua faapea foi ona faaalua mai e le afioaga lo latou matua lagolagoina o le Tulafono Faatonutonu o Faigafaiva a le Malo ua i ai nei mo le faatapulaaina o mataupega ma tili.

Tulafono

Ua matua faasaina lava ona toe fagotaina upega tatao e i lalo ifo o le 2 inisi (50 mm) lona mataupega faapea foi ma tili ia le i lalo ifo o le 1.2 inisi (30 mm) i gataifale o Vailuutai.

Faasalaga

O soo se tagata o le afio'aga e solia lenei tulafono o le a faasalaina i le \$100.00 Mo tagata mai isi afioaga o le a molia ma faasalaina i le tulafono faatonutonu o faigafaiva a le Malo o Samoa.

Fuafuaga faataatitia a le ofisa

O le lagolagosua mai a le ofisa o faigafaiva e ala i lana polokalame fesoasoani, o le tuuina atu lea o faamatalaga e saga faamautuina ma faamaopoopoina ai lenei tulafono.

7.8. OGASAMI FAASAOINA

Otootoga

Sa faaalua e le afioaga, o le vave faatupulaia o le tamaoaiga ua tataua ona avea se vaega o le gataifale ma vaega faasao, e vave ai ona toe faatupulaia le faitauaofai o ia ma figota i le gataifale. O lenei vaega faasao o le a faasaoina ai amu, aau faapea foi ma i'a ma figota ina ia mafai ona maua e nei meaola le avanoa e tautuufua ma fanafanau ai.

O le autu taua lava, o le a avea lenei faasao ma :

- punaaga o i'a ma figota ae le gata i lea o le a,
- tuuavanoa lea mo le toe faaleleia o le siosiomaga o le gataifale.

O le a fanafanau ma tautuufua i'a ma figota o loo aumau i le vaega faasaoina ma tafea atu o latou fua fanau ma faatupuina ai, nisi meaola fou i nofoaga ua le maua ai ni ia ma figota. O le a le pine ona manuia ai i tatou ae faapea foi tupulaga o le lumanai.

Fuafuaga faata'atitia a le afioaga

O le a filifilia e le afioaga se vaega o le gataifale e faatinoina ai le vaega faasaoina. O le a latou fausiaina foi se tulafono e faasaina ai ni faigafaiva ona faatinoina i lea vaega. O le afioaga foi latou te mataituina ma faamalosi tulafono a le afioaga.

Tulafono

Ua matua faasaina lava ona toe faatinoina soo se ituaiga faigafaiva, tagata lautele, solia pe uia foi e ni vaa fagota po o se isi lava ituaiga vaa i totonu o lenei vaega o le gataifale o le a faasaoina

Faasalaga

O le solia o lenei tulafono e soo se tagata o le afioaga o le a faasalaina i le \$500. O tagata mai isi afioaga o le a molia sao ma faasalaina i le tulafono laiti o faigafaiva a le afioaga o Vailuutai.

Fuafuaga faataatitia a le ofisa

O le a fesoasoani le ofisa i le faatinoina o le iloiloga o le tulaga talafeagai o le gataifale mo se vaega faasaoina. E le gata i lea a o le tuuina atu o fautuaga ma faamatalaga mo le tausiga, pulea ma le vaaia o le vaega faasaoina o le gataifale o le afioaga. E fesoasoani atu foi le ofisa i le tapenaina o tulafono e puipuia ai le vaega faasaoina.

7.9. TUFAINA ATU MA LE FAA-FAATOAGAINA O I'A MA FIGOTA

O le tufaina atu, ua faatatau lea i le aumaia o ni figota poo ni i'a mai se isi atunuu ma tufa atu e faaola i se ogasami ua talafeagai. O le faa-faatoagaina ua faatatau lea i le faaolaina o figota i se nofoaga ua saunia.

O le tufaina atu ma faa-faatoagaina, o nisi nei o atinae mo le faatupuina o figota aua le fofoga taumafa o le afioaga. O nei auala faa-atinae e moomia ai lava le galulue filiga ma le faamaoni o le afioaga ina ia ausia se taunuuga lelei.

Sa faaalua mai e vaega taitasi, o nisi o figota sa maua i lo latou gataifale ua tauau ina mou atu. O nisi o nei figota ua masalomia ua le toe maua i le taimi nei. O lea ua latou faatalosagaina ai nisi o figota e faa-faatoagaina i lo latou gataifale.

Fuafuaga faataatitia a le afioaga

Ua i ai le fuafuaga a le afioaga o le a latou mataituina ma vaaia lelei figota o le a tufaina atu mo le faa-faatoagaina i aloalo aemaise o le mautinoa lelei o lo latou saogalemu mai le faaleagaina.

Fuafuaga faataatitia a le ofisa

O le a fesoasoani le ofisa i le tufaina atu lea o figota e faa-faatoagaina i aloalo ma iloiloina le tulaga talafeagai o le gataifale mo nei figota. O le a saunia foi ni aoaga e faamalamalamaina ai le olaga faa-natura o nei figota aemaise o le mataituina ma le tausiga lelei.

7.10. IA FAASALALAUINA TULAFONO A LE AFIOAGA

Otootoga

Na fautuaina e le komiti Faufautua mo le Vaaia ma le Pulea tatau o i'a ma figota o le Gataifale le faasalalauina o tulafono a le nuu ua faamoemoe ma faaagaga i le pupuiga o le siosiomaga o le gataifale ma ona tamaoaiga ma faigafaiva.

Fautuaga

O faasalalauiga i leitio o le a gafa le ama Alii ma Faipule. O le Komiti Faufautua mo le Vaaia Lelei o I'a ma Figota o le a gafa lea ma le faamaopopoina aemaise le tapenaga o faasalalauiga e faatatau i tulafono e puipuia ai le siosiomaga o le gataifale ma le vaaia lelei o i'a ma figota.

Autu o le Faasalaga : Puipuiga o le Gataifale o Vailuutai
--

Taimi Fautuaina

O faasalalauga uma e ao ona faamaopoopoina pe a maea ona faamaonia uma tulafono ua faatatauina ma faagaga i pulega o le siosiomaga o le gataifale ma le vaaia lelei o i'a ma figota.

7.11. IA FAASAINA TU'IGA MA FAAMO'A

Otootoga

O tu'iga ma faamo'a ua matauina ma le toto'a e le afioaga le matua faaleagaina ai o le gataifale. o ituiga faigafaiva inei e faigofie ai ona maua ai i'a ma figota peitai e ogaoga ma matautia ona aafiaga. O lea ua tasi ai le finagalo o alii ma faipule ina ia faasaina loa ona toe faatinoina i le gataifale o Vailuutai.

Fuafuaga Faataatitia a le Afioaga.

Ua i ai le fuafuaga a le afioaga o le a faamalosia ma faamamalu loa lenei fuafuaga ua faataatia mo le faasaina o tu'iga ma faamo'a ma lagolagoina tulafono Laiti o Faigafaiva.

Tulafono

Ua matua faasaina ona toe faatinoina ni tu'iga ma faamo'a i le gataifale o Vailuutai.

Faasalaga

O tagata o le afioaga o le solia lenei tulafono o le a faasalaina i le \$500.00, o tagata mai isi afioaga o le molia i le Tulafono a le Malo.

Fuafuaga Faataatitia a le Ofisa

O le a fesoasoani le Ofisa mo le avea o lenei tulafono ma Tulafono Laiti (By Laws) ma o le a faia foi ni aoaoga i le taua o le faasaina o tu'iga ma faamo'a.

7.12. IA FAASAO MA FAATELEINA AMU.

Otootoga

O le puipuia ma le faasaoina o amu, o se tasi lea o auala ua mafai ona toe tutupu ma ola ai amu. O le faateleina o amu, o se itu lelei lea mo i'a ma figota aemaise meaola ninii o le gataifale o loo faalagolago mo meaaai ma o latou nofoaga. O le faia o se ogasami faasaoina ma le taofia o faigafaiva le talafeagai o nisi ia o fuafuaga tatau ma le talafeagai mo le faateleina o amu.

Fuafuaga Faataatitia a le Afioaga

Ua faaalua e le Komiti, o le faia o se ogasami faasaoina o se auala lea ua mautinoa ua mafai ona faasao ma faateleina ai amu. O lenei faasao o le a faatinoina e le Komiti faapea ai ma le Pule Mamalu a Alii ma Faipule. O le vaaia lelei ma le mataituina o lenei faasao o le a feagai lea ma tagatanuu o le afioaga.

Fuafuaga Faataatitia

O le a fesoasoani le Ofisa i lle faamalamalamaina o itu lelei o le faasaoina o amu. O le a galulue faatasi le Ofisa o Faifafaiva ma le afioaga i le faatinoina o se suesuega i se vaega o le gataifale o le a faagaga mo le faasaoina.

7.13. IA FAASAINA LE FAGOTAINA O FUGAFUGA, MAMA'O, MAISU MA ISI FIGOTA O LENEI ITUAIGA MO LE FAATAUINA ATU MO MAKETI I FAFO.

Otootoga

O figota e pei o fugafuga, mama'o, sea ma isiituaiga o loo faatauina mo le fofoga taumafa o tagata Samoa. O nei figota e faigofei ona fagotaina ona e maua i nofoaga papa'u. Talu ai o le faigofie ona fagotaina o nei figota ua i ai se popolega e faaono tulai mai ai le faaitiitia o nei tamaoiga i se taimi o le lumanai pe a faaauau pea ona fagoaina mo le auina atu i maketi i fafo. O le aua moomia tele ai ni tulafono e ao ona puipuia ai le soona fagotaina o nei figota.

Fuafuaga Faataatitia a le Afioga

O le fagotaina o fugafuga, mama'o maisu ma isi ituaiga mo maketi i atunuu i fafo ua mafua ai le tulaga faaitiitia o le mauaina o nei figota i gataifale o Vailuutai. Ua fautuaina e le Komiti Faufautua mo le Vaaia Lelei o I'a ma Figota fautuaga nei.

Tulafono Faafautuaga

Ia faamuta ma faasaina loa le fagotaina o nei figota mai le gataifale o Vailuutai, ma ia tau lava na o le fagotaina mo le fofoga taumafa.

Tulafono

(a)Ua matua faasaina lava ona toe fagotaina mai fugafuga, mama'o maisu ma isi o nei ituaiga mo le faatauina atu mo maketi i fafo sei vagana ai le fagotaina mo le fofoga taumafa o le afioga.

(e)Ua faasaina foi se tagata faipisinisi ona faatauina mai ituaiga o figota e pei ona taua i luga mai lenei afioga.

Faasalaga

O i latou e le utagia mai lenei tulafono o le a faasalaina i le \$500.00. Mo tagata faipisinisi fugafuga o le a faasalaina i le \$1,000.00. Afai lava o le a le utagia pea lenei tulafono, o le a molia loa i le Tulafono a le Malo.

7.14. IA FAASAINA LE LAUESEINA O LE ONEONE.

Otootoga

O le faateleina o apitagalu ma matafaga mai le fetafeaiga o au ma galu malolosi ua faapogai mai lea ina ua tele se vaega o oneone o le matafaga poo le gataifale ua asuina. Ua avea foi le auina o le oneone ma mafuaaga ua faaitiitia ai ona toe ofaga le tele o meaola o loo aumau i nei vaega o le gataifale ona o le tulaga nefu o le sami.

Fuafuaga Faaitiitia a le Afioga.

Na faaalua e le komiti o le laueseina o le oneone mai le sami o se tasi lea o mafuaaga o le faaitiitia o ia ma figota aemaise ai le faaleagaina o le siosiomaga o le gataifale. O lea ua fausia ai se manatu ina ia taofia le faia o lea tulaga se i vagana se pemitā faatagaina mai i

lenei afioaga o Vailuutai e a ala lea i se tusi aloaia e mafai ai ona faia lea tulaga i gataifale o lenei afioaga.

Tulafono

Ua matua faasaina lava so o se tagata ona toe eliina le oneone o lenei afioaga se i vagana o se tusi aloaia mai le afioaga e mafai ai ona faatinoina lea vaega.

Faasalaga

O i latou uma o le a le usitaia lenei faasalaga o le a molia loa i le tulafono a le Vaega o Faigafaiva.

Fuafuaga Faataatitia a le Ofisa o Faigafaiva

O le a fesoasoani le ofisa o Faigafaiva i le Afioaga i le faamautuina lea o lenei tulafono faatasi ai ma le tufaina atu o ni pepa o faamatalaga e faamalamalama atili ai mo le silafia e le mamalu o le atunuu.

7.15. Ia unaia faigafaiva i tuaau ma aoaoga mo faigafaiva.

Otootoga

E mafai ona faaleleia le tamaoaiga o i'a ma figota maua i aloalo, aau ma vaega o le gataifale ua faaleagaina. Pe afai ae faaititia le fagotaina o nei vaega o le gataifale, ia poo le unaia o tulaga tau faigafaiva i tuaau ma aau mamao.

O se tasi o auala e faaleleia ai le tamaoaiga o le gataifale, o le fagotaina lea o ogasami o le gataifale e lei fagotaina lava aemaise o tuaau.

Ua i ai le talitonuga i le Komiti Faufautua mo le Vaaia Lelei o i'a ma figota e ao ona unaia ma faamalosi faigafaiva i tuaau ma aau mamao ina ia tuumamaina ai le fagotaina o i'a ma figota o le aau ma le aloalo. Ua le gata foi i leae o le a mafai ai ona toe faatupulaia ma faaleleia ai le tamaoaiga o le tele o vaega o le gataifale ua faaleagaina. Talu ai ona o le tele o nuu e leai ni vaa e talafeagai mo fagotaga i tuaau o lea ua taumafai ai le Ofisa o Faigafaiva e sailia ni vaa talafeagai mo le faamoemoe.

Fuafuaga Faataatitia a le Afioaga

Ia talosagaina le Ofisa o Faigafaiva ina ia faatinoina se aoaoga i auala tau faigafaiva e aoaoina ai le au tautai o se nuu ma ia faatautaia e se Alii Ofisa o Faigafaiva ua i ai se tomai faapitoa tau faigafaiva.

Fuafuaga Faataatitia a le Ofisa o Faigafaiva

O le a iloiloaina e le Ofisa o Faigafaiva manaoga tau i auala tau faigafaiva e ao ona fesoasoani ai e aoaoina ai le mamalu o le autautai o le afioaga. O itu taua o le a aafia i nei aoaoga e pei o le teuina ma le vaaia lelei o i'a, saogalemu i luga o le sami, tausiga o afi vaa, faasuina o i'a, ma isi lava mataupu taua.

FAAMATALAGA FAAOPOOPO

Vaa mo fagotaga i tuaau:

O le leai o ni vaa talafeagai mo fagotaga i tuaau o le ala lea ua avea ma vaegase i le unaia o faigafaiva i tuaau. E leai se vaa fagota e i le va o le alia ma paopao, ma o se vaa i lea va ua talitonuina o le a talafeagai mo faigafaiva i tuaau. I sailiiliga a le Ofisa o Faigafaiva i se vaa talafeagai, ua filifilia ai le vaa e i le va o le 14ft – 16ft ma o lona tau a ititi ifo o le \$10,000 tala tuufaatasi i ai ma lona afi. O lenei ituaiga vaa e mafai ona faaaauvaaina e ni tagata se toalua pe toatolu foi ma e mafai ona faaaogaina lenei vaa i faigafaiva i tuaau. O le a fesoasoani le Ofisa o Faigafaiva i aiga taitasi i mea tau nonoga tupe aua le faatauina o le vaa ma le afi. O le a faia foi ni aoaoga mo le saogalemu i luga o le sami, teuina ma le vaaia lelei o i'a, tausiga o vaa atoa ai ma le faiga o mea fagota.

MANA O TALOSAGA

Otootoga

O talosaga ma talitonuga tuufaatasi faa-le-lotu, o se tasi lea o faamoemoega ua talitonuina lona taua aua le puipuia ma le faasaogalemuina o le siosiomaga o le gataifale ma ona tamaoaiga.

Fuafuaga faataatitia a le afioaga

O le sao taua o le aufailotu, o le unaia lea ma faamalosiua i tagatanuu ina ia latou faatauaina le puipuia ma le faasaoina o le siosiomaga o le gataifale ma ona tamaoaiga. E taua tele lenei fuafuaga e tuufaatasia ai finagalo o tagata, ina ia galulue faatasi e foia faafitauli o loo aliae mai i le siosiomaga o le gataifale.

Ua lagolagoina foi e le komiti lenei fautuaga ma fautuaina ai le mamalu o le afioaga, o le a latou faamamaluina faatasi lea aso faailogaina mo tatalo ma anapogi a le Malo i tausaga taitasi. O ia tatalo ma anapogi o le a talosia ai laufanua, gataifale aemaise o tagatanuu o le afioaga i Samoa nei ma atunuu i fafo.

Fuafuaga faataatitia a le ofisa o faigafaiva

O le a mafai ona tuuina atu ni fesoasoani mai le ofisa mo le mamalu o le aufailotu e ala i pepa o faamatalaga ma tautalaga ina ia fesoasoani i le tapenaina o a latou lauga ma aoaoga mo le puipuia ma le faasaoina o le siosiomaga o le gataifale ma ona tamaoaiga.

Talosaga a le afioaga

O nei talosaga sa mafai ona tuuina mai e sui o le afioaga sa auai i fonotaga ma le ofisa i taimi o faatalatalanoaga i vaega e tolu. O talosaga uma foi la ua tuuina mai sa faamautuina e le Komiti i le latou fonotaga ma le ofisa. Pe a talafeagai, o nei talosaga o le a mafai ona iloiloaina e le Ofisa o Faigafaiva mo le faataunuina pe a maea le taliaina o lenei tusi e le pule mamalu a ali'i ma faipule i le fono tele. O talosaga uma sa tuuina mai o loo faailoa atu i lalo:

- (a). Faisua
- (e). Ogasami Faasao mo ia ma Figota.
- (i). Tilapia
- (o). Vaa fagota
- (u). Aoaoga i mea tau Faigafaiva

8. MALILIEGA

Ua i ai le maliliega o le a galulue soosoo tauau uma vaega i le puipuiga o le siosiomaga o le gataifale mo le manuia o tagatanuu o le afioaga aemaise o tupulaga o le lumanai. O lea manuia e mafai ona maua pe a faatinoina uma fuafuaga faataatitia ua tamauina i le fuafuaga tatau mo le pulea ma le vaaia lelei o i'a ma figota o le afioaga.

Toe iloiloina o lenei Fuafuaga Tatau

Otootoga

O le toe iloiloina o lenei fuafuaga tatau, e sailia ai le agai i luma ma lona toe suesueina ina ia faailoa le taua ma le aoga o lenei polokalame i totonu o nuu ma afioaga, aemaise o ni auiliiliga maumaututu i le tulai mai o galuega fai a le afioaga ma le ofisa i le faataunuuina o fuafuaga faataatitia e pei ona taua i luga. O lenei foi iloiloga e lipotia ai le taulaumanuia ma ni fa'aletonu o le polokalame talu ona faavaeina i le afioaga.

Fuafuaga faataatitia a le afioaga ma le ofisa o faigafaiva.

Ua iai le maliliega a le Komiti faufautua a le afioaga ma le ofisa o faigafaiva o le a toe auiliiliina lenei fuafuaga tatau pe a maea le ono (6) masina talu ona pasia lenei tusi i le fono mulimuli. O le a toe feutagai ai le komiti ma le ofisa i se aso o le a atofaina pe a atoa le ono (6) masina.

9. UPU MULIMULI

O le auai o le afioaga o Vailuutai i le polokalame mo le pulea ma le vaaia lelei o i'a ma figota ua mautinoa le

anuia o le afioaga i ni tausaga o i luma. O le manuia ma le alualu i luma o lenei polokalame e faalagolago tele i le galulue faatasi o le afioaga; i le pule mamalu a alii ma faipule, komiti a tina, aumaga aemaise o le malo e tau ala mai le ofisa o Faigafaiva i le faatinoina o fuafuaga faataatitia ua maea soalaupule i le tele o fonotaga ma faatalatalanoaga sa faia.

O lenei polokalame o se galuega e umi se taimi e faatali ai ni tali faaaliali ma sona lelei, o lea e taua ai mo le silafia e tagatanuu o le afioaga. O i latou o le a talisapaia ma aeae i nei manuia o tupulaga o le lumanai o le afioaga. O lea ua ae ai se tofa i le afioaga e faia se polokalame faapenei a le malo e fesoasoani ai e toe tapue mai le sosia o le tamaoiga o le gataifale o le afioaga ua tauau ina mou atu.

10. ITUAIGA O FAIGAFAIVA E FAATINO I ASO UMA.

Ituaiga Faigafaiva	Taimi faaalu i fagotaga.	O ai e faatinoina nei faigafaiva.			O le faaaogaina o i'a/figota maua.		
		Alii	Tamaitai	Tamaiti	Aiga	Faatau	Aiga/Faatau
Maulu & matatao	3 itula/aso				√		√
Ofe	2 itula/aso	√		√			
upega	2 itula/aso	√			√		√
Aoina o figota	3 itula/aso	√	√	√			

Faamatalaga Faaopoopo

- Faigafaiva ua faasaina - ava niukini , tuiga, faamoa, tane mauu, lama moliuila
- Faasaina foi tagata mai isi afioaga ona fagotaina gataifale o Vailuutai.

11. I'A MA FIGOTA

Ituaiga I'a.	Ituaiga Faigafaiva	Taimi Faaalu.	
		Taimi nei.	10 tausaga.
1. Mataleele	Mata	6 itula	1 itula
2. Gatala	Seugatala	2 itula	1 itula
3. Pone	Lama	2 itula	1 itula
4. Fugausi	Lama	2 itula	1 itula
5. Laea	Lama	2 itula	1 itula
Ituaiga Figota.			
1. fugafuga	Tofutofu	1 ½ itula	½ itula
2. Sea	Tuisea	1 ½ itula	½ itula
3. Loli	tuiloli	1 ½ itula	½ itula

Vaega taua o le Siosiomaga mo Faigafaiva

Vaega ua te'a	Vaega taua (sikuea mita) taimi nei	Sefulu tausaga
Togatogo	>5 eka	7 eka
Amu	500	1,000
Vaovao o le sami	200	200

12. SUI O LE AFIOAGA SA AUAI I FAATALATALANOAGA I VAEGA E TOLU

Matai:

Afamasaga Faamatala (faipule)	Tuigamal Peni	Lio Utapo
Tuigamala Taimua	Leaitua Niko	Tutuila Eti
Soonai Ulaula	Tausula Fatu	Taufono Lole
Taufono Amerika	Soonai Atioka	Taufono Seu
Taufono Sausaulele	Seupule Seumalo	Faasina Seuteva
Faitaua Ulaula	Taufono Joe	

Aumaga :

Iloa Iloa	Saila Soonai	Toni T Amerika
Livi Soonai	Lalofau Sefo	Sa. Moloasi
Vesi Olo	Aso Leumuava	Nofo Siulai
Komiti Soonai	Sausaulele Jr	Misikea Semau
Viki Peau	Samuelu Mati	Faamelea Tavita
Sauleoge Faiiai	Pauaea Tuipea	Faalii Soonai
Palisi Maea	Asotasi T Joe	Tupito Lauano
Perenise Lauano	Fereti Gasio	Falesa Siasoi
Fiata Faasina	Tauinaola Levi	Sefo Paga
Alofa Tiasaga	Sikoloni Sikoloni	Mose Tuipea
Mautofu Tuigamala	Tavita Vaega	Savauli Tutuila
Lotomau Telea	Lolo Pio	Iulai T Joe
Kesi T Joe	Tagi Fifika	Iaeva T Lua
Afasene Semau		

Komiti Tina :

Tofu Tuigamala	Sitina Tavui	Maima Tuipea
Taualagi Falesa	Litara Soonai	Nava Semau
Faasuesa Tiasaga	Vaimoe T Joe	Vaiokupa Muliaga Sefo
Puafiti Levi	Tuatua Mulipola Fala	Maria Lotomau
Saimaauga Leitu	Lameta Taufono Seu	Lagi Mata
Litia Mose	Sulesa Semau	Nori Tutuila
Ponia Semau	Laumata Paga	Savelina Tausala I
Leleiga Soonai U	Tina Maiama	Kamei Tausula F

13. KOMITI O LE FAASAO

Komiti Matai: Tuigamala Taimua Taufono Amerika	Faasina Seuteva Lio Utapo	Faitaua V Lio Titi
--	------------------------------	-----------------------

Komiti Aumaga: Iloa Nofo	Lolo Falesa	Afasene
---------------------------------	-------------	---------

Komiti Tina : Sulea Semau

Litara Soonai

Vaimoe Taufono

Kupa

Taulagi

14. SUI O LE VAEGA O FAIGAFIIVA

Ueta Faasili

Dr Michael King

Siamupini Iosefa

Nichole Horsman

Apulu Fonoti

Autalavou Taua

Voli Sooaemalelagi

Tauvae Sua

Kaisara Liu

Susau Siolo

Iulia Kelekolio

Faatonu Lagolago o Faigafaiiva

Taitai Polokalame Fesoasoani Ausetalia

Sui Ofisa Faigafaiiva (Upolu)

Tamaitai Ofisa Faigafaiiva (Upolu)

Alii Ofisa mo le Vafealoai ma nuu ma afioaga

Alii Ofisa Faigafaiiva

Alii Ofisa Lagolago Faigafaiiva

Alii Ofisa Lagolago

Alii Ofisa Lagolago

Tamaitai Ofisa Lagolago Faigafaiiva

Tamaitai Ofisa Lagolago Faigafaiiva (Savaii)